

Pauro Piripos ezektsa bo ziwatahaka

Pauro Piripos ezektsa bo Sesus soho nitsasoko iwaze wastuhu Sesus humo sispirikporêtsa niyziknaha. Bykyze sakyriukanikitsa hurukwy eze niapykyrykze sibo ziwatahaka. Deus hyrikoso Pauro tuk niapykyryk iwatahi Deus harere ziwatahaka iwatsahi katsa kino niwatihi Sesus soho humo tanymyrky.

1 ¹Uta Pauro Timoteo niwatihi ahatsa katsaktsa Sesus Kiristu tsumuêhîtsa tsimaha. Timoteo katuk my. Uta Sesus Kiristu tsumuêhîtsa ahabo piwatahaka. Ikiahatsa Sesus tuktsa Piripos ezektsa ahabo piwatahaka. Sesus tuktsa sispirikpokotsa sitsumuêhîtsitsa kino niwatihi sizubarêtsa bo piwatahaka.

²Deus myzo bo mopamykysoko. Sesus Kiristu kino niwatihi iharere bo hyÿ tsimykananaha. Sibo hi mopamykysoko. Uta hi ispe my:

— O Deus myzo Piripos ezektsa Sesus tuktsa tysipokzitsikta! Ikia humo sakurêtsa moziknaha ba paikpa mytsaty zikaha — my. Iwa ahatsyhyryze mykara.

Pauro Piripos ezektsa tsyhyryze Deus bo nipamykysoko.

³Ahasoho humo mytsaty mykaraze Deus bo mosakibaziki:

— O Deus ikia zuba tsamysapyrêta — mykara. ⁴Deus bo ahatsyhyryze mopamykysokoze kakurêta. Ahazubarêtsa tsyhyryze Deus bo mopamykysokoze kakurêta hÿ. ⁵Hawa tapara tsiktsumuêhîkînahaha bo mytsaty mykara. Deus harere ahabo iktsasokoze ikziakbata zuba iharere bo hyÿ tsimykananaha nawaze tsiktsumuêhîkînahaha iwatahi kakurêta hÿ.

⁶Ikiahatsa meky watu tsimoziknaha. Deus humo ahamysapyrêtsa tsimoziknaha. Iwa ahatuk mykara hawa mozihikik Deus zikwy humo yhÿ tsimykananaha. Aibani zuba Sesus Kiristu myziksizoze hawa Deus mozihikikze mopykba.

⁷Ikiahatsa soho mytsaty mynkaraze ana humo hi kakurêta. Ahahumo kamypokzitsiarêta. Kytza sakyriukrênikitsa hurukwy bo zikoktyhyryknahaze, ziktsumuêhînahaha katuktsa tsikyzyknaha hÿ. Abaka sakyriukrênikitsa hurukwy eze tsiktsumuêhîkînahaha. Iknakuruze Deus

wasania ty ziwatawyky. Iharere zibetesaka ana humo hi kytsa iharere bo hỹ nikananaha sispirikporētsa niyziknaha. Ikiahatsa kino niwatihi tsiktsumuēhīkīnaha. Iwatahi ahahumo kamypokzitsiarēta iwa wasani my h̃y. ⁸Sesus Kiristu kahumo tsimypokzitsiarēta h̃y. Iwatahi utakta iwata my ahahumo kamypokzitsiarēta:

— Wasape my. Iwa Deus okzeka motsasoko ahahumo kamypokzitsiarēta h̃y. Ikiahatsa humo ka kahyrizikbarēta iwa Deus zikyrinomyryky — my.

⁹Deus bo ahatsyhyryze ipe my:

— O myzo Sesus tuktsa Piripos eze ktsa ahumo simypokzitsirētsa. Ikia humo hi myharape pokzitsikinaha. Asoho pinymyrytohinaha! Ba ziksimiwy hawa myhyrinomyrywy baba humo sihyrinomyrētsa iwa tysitsumuēhīkīkta — my.

Iwa Deus bo ahatsyhyryze mopamykyso. ¹⁰O Piripos eze ktsa hawa tsimykara naha humo ahahyrinomyrētsa hawa wasani haty ahahyrinomyrētsa. Ba zikmyinaha. Nawa tsimyzurukunaha zeka Sesus myziksizoze batu ahasikpyby. Ahamysapyrētsa tsimoziknaha iwaze batu ahasikpyby. ¹¹Iwa tsimyzurukunaha zeka wasania ty zuba tsimykaranaha. Hawa wasani tsimykaranaha. Iwaze kytsa sizubarētsa ahahumo hi Deus bo motsasokonaha:

— O Deus ikia zuba tsamysapyrēta. Ikia zuba wasani tsimykara — maha. Iwa ahahumo Deus bo mosakibazikiknaha.

Kabo ka Kiristu zuba mozihikik.

¹²O katukytsa hawa kytsa piksukyrykiknaha Sesus harere iktasokoze, kytsa sizubarētsa humo wasani niyziknaha. Abaka kytsa sizubarētsa Sesus harere bo hỹ mykaranaha iwatsahi ihumo sispirikporētsa moziknaha. Sinini ikykaraze Sesus harere bo hỹ mykaranaha iwatahi kakurēta. ¹³Ana kino sodadutsa pikperykynaha. Kytsa sizubarētsa kino niwatihi kasoho botu ziwabynaha. Uta kino sakyriukanikitsa hurukwy eze tu Sesus harere motsasoko ana hi ziwabynaha.

¹⁴Iwaze katukytsa kabo iktsa mykaranahaze sakyriukanikitsa hurukwy eze tu sipunihikrētsa moziknaha. Deus hi nisiakuwyky iwatsahi Sesus harere bo hỹ mykaranaha ihumo sispirikporētsa. Sipunihikrētsa tu nanabyitaba Sesus harere motsasokonaha. Sipybybyitsa mykaranaha Sesus harere motsasokonaha batu pyk zikaha.

¹⁵Wastuhu zuba kytsa niharapepehakanahatsa humo Sesus soho motsasokonaha. Kahumo sizokdirētsa iwatsahi Deus wasania ty Sesus soho motsasokonaha. Utsaktas batu. Asahi simyzihikrētsa Deus harere siakparawy iwatsahi Deus wasania ty motsasokonaha. ¹⁶Asahi kahumo simypokzitsirētsa iwatsahi Deus wasania ty motsasokonaha. Tubabatu Deus kape niy:

— Ahyriziktsokzawy humo wasania tytsaso. Myzubaha bokta! Kaharere wasania ty sibo tsiwatawykta! — niy. Iwatsahi asaktsa simyzihikrêtsa katsyhyryze Deus wasania ty motsasokonaha. ¹⁷Utsaktsa batu. Sizokdirêtsa tu Sesus soho motsasokonaha, taha bo zuba mynakaranaha. Batu wasani zikaha. Asahi:

— Katsaktsa Sesus soho motsasokonaha zeka katsa Pauro watsa tsimoziknaha. Iwaze kytsa mysoho “O asahi sihyrinymyrêtsa maha” mytsaty ahabyitsa zikaha. O Pauro sakyriukanikitsa hurukwy eze mysoho ziwabyze iaku byita niyzik mytsaty ahabyitsa mykaranaha — nikaranaha.

¹⁸Wasaniha ty Sesus soho motsasonahaze anahumo hi kakurêta. Kytsa taha bo zuba mytsaty mykaranaha zeka Sesus soho motsasonahaze. Kytsa kino niwatihi simyzihikrêtsa mykaranaha zeka Sesus soho motsasonaha iwatahi kakurêta mykara. Wasaniha ty Sesus soho motsasonahaze ana humo hi kakurêta mykara. ¹⁹Iwatatu sakyriukrênikitsa hurukwy eze tu kakurêta. Hawataeze piksukenaha ana humo hi kahyrinymyrêta. Ikiahatsa katsyhyryze Deus bo tsimypamykysokonaha atahi pahawaby iwaze piksukenaha. Sesus Kiristu hyrikoso piktsumuêhî iwatahi piksukenaha anahumo hi kahyrinymyrêta.

²⁰Kiristu tuk zuba mynakara ana hi mozihikik. Kamysapyrêta mynakara Kiristu kabo iktsa my zeka batu kasikpyby. Abaka Kiristu soho motsasokoze batu kapyby. Kapunihikrêta tu Deus wasaniha motsasoko. Iwaze kytsa hi:

— O Sesus Kiristu imysapyrênikita hÿ — maha. Utakta kaspitu mopykyryk zeka yhÿ my. Kytsa pikbezenaha zeka niwatihi yhÿ my. Kiristu ihyrinymyryta babata harere mozihikik. ²¹Uta kaspitu zeka Kiristu harere kytsa bo motsasoko. Kytsa Deus pe — O ikia zuba tsamysapyrêta — maha. Mohyrikosokda zeka uta Deus tuk kawahi mynapykyryk.

²²Uta kaspitohitu zeka kahyryziktsokzawy humo tybyri zuba mynakara wasani my. Hawa ha ty ja myzihikik batu kanyhy. Uta kaspitu mynapykyryk zeka hawa my. Kytsa pikbezenaha zeka wasani. Hawa ja mozihikik. Paikpa mytsaty mykara. Ske myparawy waha bo ikzumu. ²³Mohyrikosokda tsihikik. Iwaze Kiristu tuk kawahi mynapykyryk. Iwatahi abaka pikbezenaha zeka wasi. ²⁴Nawa tatu napykyryk zeka pahatsumuêhî iwaze ahahumo wasani. Iwatahi ahahumo mynapykyryk. ²⁵Yhÿ ahatuk mynapykyryk iwaze pahatsumuêhî ana humo hi kahyrinymyrêta. Iwaze ikiahatsa Sesus harere bo hyÿ tsimykaranaha ihumo ahaspirikporêtsa tsimoziknaha iwa pahatsumuêhî. Ahaspirikporêtsa tsimoziknaha ana humo hi pahatsumuêhî iwaze ahakurêtsa tsimoziknaha. ²⁶Iwaze ahabo mynakozoreze ikiahatsa hi:

— O katsaktsa mykurêtsa Sesus Kiristu zikwy Pauro mybo ziwatawy iwatsahi mykurêtsa hÿ — tsimaha

Deus harere humo ahapunihikrêtsaktsa!

²⁷Kyze Sesus Kiristu harere bo hyÿ tsimaha ahaspirikporêtsaktsa! Iharere bo zuba hyÿ tahaktsa kytsa! Kyze ahabo mynakozore zeka, kaku zuba piwabyky. Ahabo zuk byizeka, kytsa ahasoho kabo motsasonaha:

— O Sesus tuktsa Piripos ezeaktsa wasani mykaranaha. Asaktsa atsa botu mytsaty mykaranaha. Iwaze Sesus harere bo tarabaja ziknakaranaha. Tyharape tsumuêhîkîna. Sesus harere bo hyÿ mykaranaha iwatsahi ihumo sispirikporêtsa Deus wasaniha humo tarabajaziu ziknakaranaha — mykaranaha. Iwa ahasoho ty mopamykysonaha. ²⁸Ahapyby byihuja. Ahasukyrytsitsa pokso ahapyby byihuja. Ahapunihikrêtsaktsa! Ahasukyrytsitsa ahabo iktsa maha zeka asahi sipybyrêtsa moziknaha, Deus zikwy ahatuk zeka iktsa mahaze ana humo hi sipybyrêtsa. Ahapunihikrêtsa tu Deus zikwy mysiwatawyky iwatsahi Deus wasaniha ba zikpykba sihyrinymyrêtsa hÿ.

²⁹Kyze Sesus Kiristu humo ahaspirikporêtsa Deus pahahyrynymyryky ikiahatsa iharere bo hyÿ tsimykarana abaka itsyhyryze tsitsumuêhîkîna. Nimywatawyhik ihumo ahaspirikporêtsaze iwa itsyhyryze tsitsumuêhîkîna. Ikiahatsa Kiristu tsyhyryze sinini tsimykarana ana humo kino niwatihi nimywatawyhik iwa sitsumuêhîkîna. ³⁰Katsaktsa mykubyrisorokrêtsa! Kytsa nimysininiwykynaha atsatu pahasininiwy botu iktsaso. Abaka tybyri zuba mykarazo ana hi tsipiwabynaha.

Kiristu wata tasopykzu.

2 ¹Abaka Kiristu zuba myzahapehaka iwatsahi ahapunihikrêtsa tsimoziknaha. Kiristu ahahumo tsimpokzitsiarêta iwatsahi ba paikpa mytsaty zikaha. Ikiahatsa hi ihumo ahakurêtsa. Deus hyrikoso ahatuk mynapykyryk. Iwaze tyharape pokzitsikinaha zikahabyitsa tu ahamysapyrêtsa tsimoziknaha. ²Iwatahi ahape my:

— O kytsa batu ahasopyk iwatsahi ba zikarapepehanaha! Hawa Sesus mymypokzitsiki iwa ikiahatsa kino niwatihi tynaharape pokzitsikinaha! Parakbaha atsa botu mytsaty tsimykarana! Ikiahatsaktsa tsahamykpyriziurêtsaktsa my — iwa tsimykarana zeka ahahumo kakurêta hÿ.

³Ahabo ka mytsaty mytsaty byitaha! — Uta zuba kahyrynymyrêta — batu tyso. Asahi iwa mykaranaha zeka siharererêtsa zuba. Ikiahatsaktsa tsahasprikporêtsa tsimahaktsa! Kytsa tuk ahakubyrisorokoktsa tsimaha. Ikiahatsa usts soho hi:

— O atakta tsimysapyrêta. Utakta batu — tsimaha. Iwa usts soho bo mytsaty tsimykarana. ⁴Usta ahatukytsa tysisakihikyknahaktsa. Batu ahasoho bo zuba mytsaty zikaha. Usta tsysitumuêhînahaktsa.

⁵Hawa Sesus Kiristu mytsaty ziknakara axtsa botu tahakxtsa isopyk watu tahakxtsa! Hawa Sesus Kiristu nikara isopyk watu kyxtsa bo ahasopyksapyhu ja tsimykaranaha!

⁶Atakta Deus wata ziknakara.

Sesus Kiristu Deus wata iwataxu tabo zuba mytsaty ahabyita nikara. Sesus Deus wata hi. — Utakta abazubata — iwa batu mytsaty nikara.

⁷Atahi tazikwy zerekik. Atahi tsumuêhĩtsa niyzik.

Atahi ihyriziktsokzawy humo ity huak ahabyita wata. Mybarawy ezekta niyzik maku babata.

⁸Maku niyzikze Deus harere bo zuba hyĩ ziknakara. Kyze Deus nizihikik nahahumo nihyrikosokda iwa sinini nikara.

Kyxtsa iharapatawyhyta humo zihyrikiknahaze iwataxu Deus harere bo hyĩ ziknakara.

⁹Iwatahi Deus okzeka Sesus myhyrizikwani niyzik.

Atahi:

— O Sesus imysapyrênikita. Sesus wasani nikara. Ata zuba myhyrizikwani — niy.

¹⁰Iwaze Sesus myhyrizikwani bjoikpe ezekxtsa bo piwatawy,

mybarawy ezekxtsa bo kino niwatihi piwatawy,

siakbatsa sizubarêtsa kino niwatihi bo piwatawyky iwa Sesus myhyrizikwani mysiwatawyky.

Iwatsahi tsezubaha iharere bo yhyĩ mykaranaha.

Sesus okeryk tahaekaratsa humo puruk puruk mykaranaha iwaze mypehakatsa mozik ziwatawykynaha.

¹¹Kyxtsa sizubarêtsa piwabynahaze asa hi:

— O Sesus zuba mypehakatsa. Atazuba mypehakatsa.

Atahi wasani mykara. Atahi imysapyrênikita — mykaranaha.

Iwa motsasokonahaze Deus myzo bo mopamykysoziukunaha hyĩ.

Sesus tukxtsa myzubaha bo Deus mysiwatawyky.

¹²Katukyxtsa wabyziutaha! Ahatuk ziknapykyrykze kaharere bo hyĩ ziknakaranaha hyĩ. Abaka nokponi iksapy mynapykyryk atsawatu kaharere bo hyĩ tsimykaranahakxtsa puêtsik kaharere bo hyĩ tynakaranahakxtsa. Hawa Kiristu mozihikik ana kino tsimykaranahakxtsa kyxtsa! Iwa iharere bo ma tsimaha. ¹³Hawa Kiristu mozihikik ana ty hi tsimykaranaha iwa Deus pahatsumuêhĩkĩ. Iwatahi zikwy ty ahabo nyny my iwatsahi ihumo hawa Kiristu mozihikik atsatu tsimyzihikiknaha. Iwa Deus harere bo zuba yhyĩ tsimykaranaha hyĩ.

¹⁴Hawa tsimykaranaha ahaharereharakyhyk byihuja.

Ahahyrikiktsokzawy tsimykaranahaze ahapepehaka byihuja.

¹⁵Ahaharereharakyhyk byizeka Deus okzeka batu ahasikypyby. Wasani

tsimykaranaha. Ikihatsa Deus tyryktsa ahamysapyrêtsa tsimoziknaha. Mybarawy ezektsa kytsa simyspihikbatarêtsa mykaranaha. Asahi simysapybyitsa ziknakaranaha. Asatuk tsinapykyryknaha. Ikihatsa situkze byrisoiktsa hyrity watsa tsimaha. Hawa bijoikpe miwa eze byrisoiktsa natahahyrizikubanahaze amypubyri mozik. Iwata ikihatsa wasani tsimykaranaha Deus harere tisapyrêna mysiwatawyky. ¹⁶Deus harere mysihyrinymyryknaha. Deus wasania ty iharere humo simysapyrêtsa moziknaha ana humo hi mysiwatawyknaha. Iwa zeka kakurêta. Sesus Kiristu myziksizoze nawa puruze Sesus kytsa soho motsaso:

— O atahi wasani mykara. Usta bo atakta batu. Batu wasani mykara — my. Nawa puruze Sesus myziksizoze ikihatsa iharere bo hyÿ tsimykaranaha iwaze ahahumo kakurêta. Hawa tsikykaranaha kahyriziktsozkaharêta mykara ahatsyhyryze wasani ikykara, kahyriziktsozkawy ahatsyhyryze kasokpykziurêta mykara iwa tsahahyrinymyrêtsa.

¹⁷Pikbezenaha zeka ja. Tubabatu kytsa hozipyrykzatsa nisibanahaze Deus bo nyny ziknakaranaha. Pikbezenaha zeka utakta hozipyrykza zikziwezokonaha nawata mozik. Deus bo uta tu piknyny. Ikihatsa kino niwatihi ahaspirikporêtsa babatsa zeka anaty hi Deus bo nyny tsimaha. Hozipyrykza hyrity wata. Ikihatsa Deus harere bo hyÿ tsimykaranaha iwaze ihumo tsimyspirikpokonahaze ana ty hi Deus bo nyny tsimaha. Kytsa pikbezenaha zeka kakurêta my. Ikihatsa kino niwatihi katuk ahakurêtsa tsimykaranaha iwaze uta kino pahakusukni. ¹⁸Ahakurêtsaktsa! Tsahakurêtsa zeka uta kino niwatihi kakurêta my.

Timoteo Epaporodito ahatsa sisoho motsasoko.

¹⁹Mypehakatsa Sesus yhÿ myzeka Timoteo ahabo myzipeha. Iwa mytsaty mykara. Hawaze ahasoho piwaby zeka kakurêta mozik. Ahasoho piwaby zeka batu paikpa mytsaty mykara. ²⁰Atakta kawata pahatsumuêhÿ tsihikik. Katukytsa tuk zeka atahi zuba ahahumo tsimpokzitsiukrêta hÿ. ²¹Utsa katukytsa taha bo zuba mytsaty mykaranaha. Sesus Kiristu pitsumuêhÿnaha zeka batu mytsaty zikaha. Timoteo batu. Atahi Sesus harere bo zuba hyÿ mynakara.

²²Hawa nikara ana hi botu tsahahyrinymyrêtsa. Isapyhanikia ty zuba ziknakara. Katuk tarabaja ziknakara. Hawa itse tazo tuk tarabajaziu nikara iwata atakta katuk tarabaja nikara. Katsaktsa Deus wasania ty kytsa sizubarêtsa bo tsiktasokonaha iwaze kytsa Sesus harere bo zuba hyÿ nikaranaha iwatsahi ihumo sispirikporêtsa moziknaha, iwa tarabajaziu tsikykaranaha. ²³Atakta ahabo myzipeha. Tapara hawa ja my mykara kahyrinymyrêta iwaze uta ahabo myzipeha. ²⁴Uta kino ahabo mynakozore tsihikik. Mypehakatsa yhÿ my zeka abanurytu ahabo mynakozore. Iwa mytsaty mykara.

²⁵Kyze mytsy Epaporodito ahabo myzipeha. Atakta katukta my katsa petoktsa tsikyzyknaha Deus wasania ty tsiktsasokonaha hỹ. Mykubyrisorokrêtsa tsikykaranaha. Atahi ahasapyzeken kabo tsikzipehanaha tahi ziktsumuêhĩkĩ. ²⁶Atakta ahahumo tsihyrizikbarêta. Tsimyitsapyrêta niyzik anasoho tsiwabynaha. Tisukatsihikrêta nikara paikpa mytsaty mytsaty nikara.

²⁷Ata kino tsimyitsapyrêta asiba nira Deus ihumo zipokzitsiki iwaze zizororowy. Mohyrikosokda zeka kasukatsihikrêta mozik. ²⁸Iwatahi aidy ahabo myzipeha tsihikik. Ibo iktsa tsimahaze ahakurêtsa. Ahahumo hi uta niwatihĩ abaka batu kasukatsihik.

²⁹Myzumuze ihumo ahakurêtsaktsa kytsa! Sesus tuktsa tyharape kusuknikinaha! Kytsa tahawatu simyhyrizikwynikitsa mozikanaha. Hawa Epaporodito nikara. Kytsa isoho — O atahi tsimysapyrêta — maha. Ahasopyksapyhu ja! ³⁰Atakta Kiristu nizihikik naha humo hi asiba nihyrikosokda. Nimytsumuêhĩze Kiristu humo asiba nira. Iwa ahatsyhyryze nikara. Ikiahatsa zikahabara iwatahi ahasapyzeken niyzik.

Hawa Deus okzeka wasani my.

3 ¹O katukytsa nepykykze ahape my: — Mypehakatsa Sesus humo ahakurêtsaktsa! tsimaha — my, ana hi mozihikik. Kyze kapehawy botu iktsaso ahabo iwatahakazo. Kapehawy humo pahatsumuêhĩ iwatahi batu kasikpyby, kapehawy humo ahabo piwatahazo:

²— O kytsa pykyhytutaha! Kytsa simysapybyikitsa humo pahaspihikbata tsihikiknaha. Sakmyitsa simysapybyitsa mykaranaha. Utsa kytsa nisipiakzyzykyknaha iwaze Deus okzeka simysapyrêtsa mytsaty ahabyitsa mykaranaha. — ³Katsaktsa Deus tyryktsa babatsa tsimaha. Tubabatu Moises harere hi:

— O kytsa tsikapiakzyzyknahaktsa iwaze iwatahata niyzik Deus tyryktsa kytsa bo tsiwatawynaha — niy. Ana kino mytsaty mykaranaha. Katsaktsa batu. Abaka katsaktsa ustsya kytsa bo mysipokzitsikinaha iwaze katsaktsa Deus tyryktsa tsiwatawykynaha. Deus hyrikoso mymytsumuêhĩ iwatsahi Deus bo tsimysakibazikiknaha:

— O Deus myzo ikia zuba wasani tsimykara. Ikia zuba tsamysapyrêta. Ikia humo ka mykurêtsa hỹ — tsimykaranaha. Deus hyrikoso humo, katsaktsa mykurêtsa, Sesus Kiristu sopykwy humo tsimykaranaha. Iwaze kytsa sinury humo nisipiakzyzykyknahaze ana humo hi batu sispirikpo. Sisopykwy humo batu sispirikpo. Sesus sopyk ty zuba tsimykaranahaze katsa Deus tyryktsa tsimoziknaha ana hi tsiwatawynaha.

⁴Katsaktsa Deus okzeka mymysapyrêtsa tsimoziknaha. Taparaktsa sopykwy ty zuba batu hỹ tsimykaranaha, sihumo batu mospirikpo. Kytsa Deus okzeka simysapyrêtsa mypehakatsa harere bo hỹ mykaranaha iwa

zeka utakta motsasotohi. Aty zipiakzykik zeka wasani mytsaty my zeka utakta wasani tohi mytsaty mykara.

⁵Utakta kapurukwy zumuze, estuba tsyhyryze ipyke kytsa zikiakzyzykiknaha. Utakta Isareu ezekta my. Kazotsa Sudeutsa niaha. Utakta Bêсами tukytsa. Kazotsa Ebereutsa niaha iwa taypyk. Utakta Pariseutsa Moises harere bo yh̄y ziknakara. ⁶Hawa wasani my ana hi mozihihik. Sesus tuktsa iksisukyrykik ana kino wasani mytsaty ahabyita ikykara. Moises harere bo yh̄y ikykara. Batu aty tohi kasoho ziktsaso:

— Atakta Moises harere bo batu h̄y nikara — niaha. Moises harere humo yh̄y ikykara iwaze Deus okzeka kamysapyrêta mozik mytsaty ahabyita ikykara.

⁷Abaka batu. Mektatu Sesus harere bo zuba yh̄y mynakara. Hawa wasani mykara mytsaty ahabyita ikykara abaka batu mysapy kahyrinymyrêta my. Iwatahi kazotsa sopykwy iksimoewybaik. Tapara taparaktsa sopykwy humo kakparawy. Abaka mahani, sisopykwy humo batu kakparawy.

⁸Sisopyk tsizubarêna botu imoewybaik. Abaka isapyrênikia zuba mozihihik. Kiristu zuba mozihihik ana kino tisapyrêna atahi kapehakatsa mozik, iharere bo zuba hȳy mykara ana hi mozihihik iwa Sesus tuk mozuruku. Hawa ikykara naha ykpyri wa. Kytsa ykpyri pipaparakanaha atsawatu ustsá sopykwy humo imoewybaik. Iwatahi Kiristu tukta babata mozihihik. ⁹Sesus tuk mynapykyryk. Utakta Sesus tuk atsatu mytsaty tsimykaranaha. Atahi amy ty tisapyrêna ty kabo nyny niy. Tisapyrêna ty kabo nyny niyze batu Moises harere ibyky humo yh̄y iky. Tisapyrêna ty kabo nyny niyze, Sesus harere bo hȳy mykara iwatahi ihumo kaspirikporêta ikyzik. Iwa. Kiristu inahyrizikpo utakta niwatihi abaka ituk mynapykyryk.

¹⁰Iwaze Kiristu harere bo hȳy mykara ihumo mospirikpoziú zeka ituk mozuruku. Iwa Kiristu tuk mozuruku. Hawa Kiristu sinini nikara utakta niwatihi iharere bo hȳy mykara zeka moziksukyrykynaha. Iwa Kiristu wata mozik. Kiristu myhumo tsimypokzitsiarêta iwatahi kytsa mysapyzeken zibezenaha. Katsa iwa tsimoziknaha batu mybo zuba mytsaty tsimykaranaha. ¹¹Iwatahi Deus mozikyryzikpowy ana hi taperyky, iwaze ituk kawahi mynapykyryk.

**Katsa Deus ske buruk tsimykurunahaze kytsa
motururukuknahaze tapara zumuta wata tsimaha.**

¹²O kytsa batu tyso:

— O uta botu kamysapyrêta ikyzik tsizubarêna inymyrybaik. Sesus harere bo hȳy mykara iwatahi kaspirikporêta ikyzik iwatahi batu kahyrinymyry tsihik — my. Iwa batu tyso. Utakta tarabajaziú mykara iwaze Deus okzeka kamysapyrêta mozik iwatahi kapaikrêta tarabajaziú

mykara. Batu kakubyri zikzumu. Ana humo hi Kiristu zikwatawyhik. Itukta ziknyhik, iwatahi kaspirikporêta babata mozik ana humo hi mynakara hỹ, tybyri zuba mykara. ¹³O katukytsa batu mytsaty mykara:

— O utakta botu ikspirikpo baba — my. Iwa batu kapetu kasopyk. Hawa isapyrênikia batu epyk. Nawaha ty ikykara naha ikspiriktsokda. Abaka hawa isapyhanikia ty ana ty zuba mykara. Kaspirikporêta ikzyik ana hi mozihikik. ¹⁴Kytsa motururukuknahaze. Ata para pomota itypyhanikita my. Ata hi batu tasukpe bo iktsa ziky. Batu paikpa iktsa ziky. Utakta iwata my. Deus Sesus Kiristu humo zikwatawyhik, ituk kawahi mynapykyryk, meky watu mozik ana hi piperyky hỹ.

¹⁵Iwatsahi katsaktsa Sesus Kiristu harere bo hyỹ tsimykaranaha ihumo myspirikporêtsa hỹ iwatsahi mytsaty tahaktsa! Aty mektatu mytsaty my zeka Deus anahumo pahahyrinymyry. Nawaha ty wasani my Deus hi pahahyrinymyry. ¹⁶Hawa Kiristu sopyk humo yhỹ tsikykaranaha atsatu iharere bo hyỹ tahaktsa kytsa!

¹⁷— O katukytsa! Hawa ahatuk zikzurukuze kasopyk watujataha tsimykaranaha. Utsa kytsa asaktsa kawatsa mozurukunaha sibo iktsaziu tsimykaranaha. Hawa mykaranahaze ahasopykzukupktsa tsimykaranaha! — my ¹⁸Hawa ha ahabo motsasoko botu iktsaso. Tsizubarêna iktsasoko abaka ahabo motsasokozo. Kytsa sizubarêtsa hawa mozurukunaha Kiristu sukyrytsita moziknaha, iwatahi kasukatsihikrêta. Hawa mozurukunahaze Kiristu sisapyzeken harapatawyhyta humo nihyrikosokdaze nispiritsokdanaha. ¹⁹Asaktsa Deus sinini ykarawy bo mysipehahik. Deus harere bo batu hỹ zikaha, hawa myzehikiknaha ana humo kino mytsaty mynakaranaha. Sisikpybyyikitsa:

— O kytsa mysopyk bo iktsa tahaktsa — maha. Sisikpybyyitsa tu taha bo zuba sisopyk iwatsahi astsatu mykaranaha.

²⁰Katsaktsa batu tsimaha. Mekywatu tsimoziknaha. Sesus Kiristu humo myspirikporêtsa iwaze bijoikpe mysapy baba my. Myhudikhudikwy tsimyzurukunahaze mysapy baba eze taperykynaha. Sesus Kiristu Deus bo mymyoktyhyrykta taperyky. Atahi bijoikpe ikny myziksizo. Mynasikzoze mybarawy bozo atahi taperyky. ²¹Myziksizoze mynury ezytyk ty mybo nyny my. Abaka mynury humo mykubyrizumu. Mymyitsapyrêtsa tsikyzyknaha. Mynury mohyrikosokda. Iwaze Sesus mekta tu mynury ty mybo nyny my. Tsimyharabokzonaha. Mynury ezytyk mozikzo Sesus nury wata maha. Inury tisapyrêta hỹ. Sesus Kiristu tsipunihikrêta. Hawa tohi zikaha ba. Izikwy humo mynury huak ty iwaze izikwy humo mekta tu nury ty ezytyk mybo nyny my hỹ, ezytyk zuba mynury mozik. Hawa tohi zikykbannahyitsa.

Mypehawy ahabo my.

4 ¹O katukytsa ahahumo kamypokzitsiukrêta. Ahahumo kahyrizikbarêta. Tsipikykusuknikinaha. Ahahumo kakurêta ahasoho kytsa bo motsasoko. Uta hi:

— O Piripos ezektsa humo kakurēta. Sesus tuktsa humo kakurēta hỹ — mykara. Iwa ziknakara. — O kytsa hawa Sesus sopyk tsimykarana ana humo kino ahakubyrisorokrētsaktsa tsimaha — my.

²Kyze utakta:

— O wytykyryk Eudia, Sītike ahaza wabytoktotahatsa! Tyharape pokzitsinahaktsa! Ikihaka ahatukytsa Sesus Kiristu humo ahaspirikporēza iwazahi Sesus harere bo yhỹ tahaktsa! — mykara.

³— Iki Sizikus katukta mynasitsumuēhĩ. Wytykyryk petoku asizahi myharape betsakannahaze tysitsumuēhĩkta — my.

Tubatu asizahi katuk tarabajaziu nikaranaha. Deus wasani haty sizubarētsa bo nitsasokonaha. Keremente kino niwatihi ustsá mytuktsa Deus wasania ty kytsa sizubarētsa bo nitsasokonaha. Katsumuēhĩtsitsa Deus tsyhyryze tarabaja nikaranaha sinaro botu ziwatahaba. Bijoikpe eze Deus nisiny papeu humo sinaro ziwatahabaik, Sesus humo meky watu niyziknaha.

Ikihatsa mytsaty mytsa byitaha Deus bo tsimypamykysokonaha.

⁴— O katukytsa Sesus tuk tsinapykyryknahaze ahaku tsiwabykynaha! Ahape myzo. Ahaku tsiwabykyzonaha! — my. ⁵Sizubarētsa tysipokzitsinaha ahakubyrisoroku ja. Sesus atsoko myziksizo ana bo hi mytsaty tahaktsa. ⁶Batu paikpa mytsaty tsimykaranaha. Batu ahape tu ahasopyk:

— O Deus myzo kahumo pipokzitsi ja. Batu kanyhy — tsimaha. Iwa batu tyso. Ikihatsa hi Deus bo tsimypamykysokonaha, amy humo ahakubyrĩ ibo tsimyzapykykynaha. Ikihatsa hi:

— O Deus myzo amy humo pikykubyrĩ eze ka abo myzapykyky. Hawa ha myzehikik zeka kabo nyny tsimy iwatahi kakurēta mykara — tsimaha. ⁷Iwa zeka mytsaty mytsaty byitaha, Deus pahapunihikwyky myzubaha ana humo kino batu sihyrinomyry ziwabykynaha zuba. Sesus tuk tsinapykyryknaha zeka mekywatsa tu tsimoziknaha. Ahamysapyrētsa tsimoziknaha. Hawa tsimykaranaha zeka mytsaty mytsaty byitaha tsimaha, Deus hi ahapokzitsikitsa my ana humo hi ahahyrinomyrētsa. Iwatsahi ihumo ahakurētsa.

⁸Pykyhytutahaktsa! Hawa mytsaty tsimykaranaha ana humo hi pykyhytutaha. Amy wasani zuba mytsatziutaha! Kytsa pipokzitsikinahaze ana humo hi mytsatziutaha! Isapyrēnikia bo mytsatziutaha! Iwa mytsatziutaha. Wasaniha bo wabyziutaha ana humo hi kytsa sakurētsa moziknaha ana bo hi mytsatziutaha. Deus okzeka, kytsa okze kino niwatihi wasani my. Sizubarētsa bo wasani my. Iwa ana bo kino mytsatziutahaktsa. Iwa tsiziurēna. Batu tymyi. Tisapyrēna iwa ana bo kino mytsatziutahaktsa! Tsizubarēna humo kino ahasikpyby byihuja ana bo hi mytsatziutahaktsa kytsa! ⁹Kaharere bo yhỹ tynakaranahaktsa!

Nawa ha ty ahahyrinymyryky naha ty tynakaranahaktsa! Hawa mozuruku ikiahatsa tihiktsa! Kaharere tsizubarêna bo hyÿ tahaktsa! Iwaze Sesus mymykusukniki ahapaok baze tu mynapykyryk.

Pauro Piripos ezektsa humo tsakurêta.

¹⁰Abaka tsiktsumuêhizonaha. Tapara tsiktsumuêhikînaha. Iwaze tsepyknaha. Tsihokdahaarêna tu tsepyknaha. Ikiahatsa kahumo tsahamypokzitsirêtsa ana humo kino kahyrinymyrêta. Abazuba kahumo ahamypokzitsiukrêtsa tsipiwatawyzonaha. Utakta Sesus tuk mynakara kakurêta, ikiahatsa tsipiktsumuêhînahaze niwatihi kakurêta mykara.

¹¹Batu kasopyk:

— O kanamy nepykta tu batu kasopyk. Kanamybyita tu wasani my. Kanamyrêta mykara zikino wasani my, iwaha tu yhÿ — mykara. ¹²Utakta kanamy tsikaeni iwaha humo tu kakurêta. Kanamy tsizubarêna ana humo kino kakurêta. Hawa mozuruku wasani my. Hawa mykara icy niwatihi kabo wasani mykara. Kasorokrêta zeka wasani my. Karaparêta kino niwatihi wasani mykara. Kanamyrêta zeka wasani mykara, kanamybyita zikino niwatihi wasani mykara. ¹³Hawa kahumo mykara ana humo hi kapunihikrêta mozik. Iwaze Sesus humo kaspirikporêta ikyzik. Kiristu humo hi pikpunihikwyky iwatahi kakurêta mozik. Izikwy humo ba hawa tohi zikaha. Iwatahi kapunihikrêta mozik.

¹⁴Iwaze tsiktsumuêhînahaze wasani tsimykaranaha. Kytsa zikyknikiknahaze batu katy arek iwaze tsikpokzitsikinaha. ¹⁵Ikiahatsa Piripos ezektsa zuba tsiktsumuêhînaha. Masedonia ikny iknaparakze ikiahatsa zuba tsiktsumuêhikînaha. Anaeze tuze Deus wasania ty ykbata zuba ikzye iktsasoko kyze kino tsiktsumuêhikînaha. Ikiahatsa zuba okyryrsaro ty kabo nyny tsikaha.

¹⁶Utakta Tesaronika eze tuze kanamy nepyk hana bo ja. Anaeze ahanamy kabo tsibiakaknaha. Tsizubarêna okyryrsaro ty kabo nyny tsikaha. ¹⁷Ahanamy humo ka batu kamyzehik. Deus isapyrênikia ty ahabo nyny my anahi mozihihik. ¹⁸Nawa ha ty ikiahatsa kabo nyny tsikaha Epaporodito zebykyryk. Tsizubarêna ty kabo nyny tsikaha. Abaka piwatahaka utakta ahanamy humo kakurêta iwaze kakurêta hÿ. Iwatahi batu kakubyri. Isapyrênikia ty topyririk koro tosikwaka. Deus ana okmorê pioksaze ana humo hi tsakurêta. Pahapokzitsiki hÿ. Ahanamy ustsa Sesus tuktsa bo nyny tsimykaranaha zeka atahi tsakurêta hÿ. Hawa tsikykaranaha topyririk koro tosikwaka. ¹⁹Amy humo ahakubyri zeka anatyhi Deus ahabo nyny my. Ikiahatsa Sesus tuk tsimykaranaha. Atahi tsinamyrêta hiba iwatahi amy humo ahaku byri zeka ahabo nyny my atahi imysakihikyrenikita my. ²⁰Iwatahi Deus koikny baktatu ipe my:

— O Deus myzo ikia zuba tsahyrizikporêta. Ikia zuba amysapyrênikita tsimy — my. Iwa hÿ.

Abaka asiba nepyk kytsa bo mytsaty mykara.

²¹Kyze Sesus tuktsa sizubarētsa ahahumo sihyrizikbarētsa. Katukytsa katuk ahahumo sihyrizikbarētsa. ²²Sesus tuktsa katuktsa ahahumo sihyrizikbarētsa. Asaktsa sipehakatsa myhyrizikwanikita humo tarabajaziu mykaranaha asahi ahahumo sihyrizikbarētsa mykaranaha.

Deus pahasapywyky.

²³Iwaze utakta ahatsyhyryze Deus bo mopamykysoko:
— O Deus myzo Sesus tuktsa Piripos ezektsa tysisakihikykta!
Mypehakatsa Sesus Kiristu tysipokzitsikikta! — mykara. Niwazuba. De.
Pauro